

四庫全書

史部

欽定四庫全書

史部

資治通鑑後編卷一百八十九

詳校官檢討臣德生

編修臣裴謙覆勘

總校官進士臣朱齡

校對官主事臣甘立誠

謄錄監生臣余元泰

欽定四庫全書

資治通鑑後編卷一百七十九

刑部尚書徐乾學撰

元紀二十七

起癸卯維太淵獻正月盡上
章因敦六月凡一年有奇

順帝

至正十九年春正月陳友諒遣其黨王奉國率兵號二十萬寇信州路江東廉訪使巴延巴哈迪音又自衢引兵援信及至遇奉國城東力戰破走之鎮南王子大聖

努樞密院判官席閨等迎巴延巴哈迪音入城共守後數日賊復來攻巴延巴哈迪音大饗士卒出城奮擊又大破之

考異元史順帝紀是年春正月甲午朔陳友諒兵陷信州路守臣江東廉訪副使巴延巴哈迪音力戰死之而忠義傳則云巴延巴哈迪音於正月自衛援信大破賊至六月而城始陷乃自刎全從之

乙巳江南行省平章以寧越既定欲遂取浙東未下諸郡集諸將諭之曰克城雖以武而定民必以仁吾師比入建康秋毫無犯故一舉而遂定今新克婺州正當撫恤使民樂於歸附則彼未下郡縣亦必聞風而歸吾每

聞爾等下一城得一郡不妄殺人輒喜不自勝蓋為將者能以不殺為心非惟國家所利即身及子孫亦蒙其福爾等從吾言則衆心豫附大功可成矣時宋龍鳳五年也丙午遼陽行省陷懿州總管呂震死之贈河南行省左丞追封東平郡公戊申江南將邵榮破張士誠兵於餘杭上都之初陷也廣寧路總管郭嘉聞之躬率義兵出禦既而遼陽陷嘉將衆巡邏去城十五里遇青號隊伍百餘人給言官軍嘉疑其詐俄果脫青衣

變紅嘉出馬射賊分兵兩隊而夾攻之殺獲甚多嘉見
賊勢曰熾孤城無援乃竭家所有衣服財物犒義士以
勵其勇敢且曰自我祖父有勲王室今之盡忠吾分內
事也況身守此土當死生以之餘不足恤矣頃之賊至
圍城亘數十里有大呼者曰遼陽我得矣何不出降嘉
挽弓射呼者中其左頰墮馬死賊稍引退嘉遂開西門
逐之賊大至力戰以死事聞贈河南江北行省左丞追
封太原郡公謚忠烈嘉字元禮濮陽人祖昂父惠俱以

戰功顯嘉由國子生登泰定進士第其守廣寧也招集
義兵數千教以坐作進退號令齊一賞罰明信故東方
諸郡糧富兵精稱嘉為最察罕特穆爾命樞密院判
官陳秉直與雅谷將兵二萬守冀寧癸丑流星如酒
盃大有聲如雷乙卯方國珍遣使奉書獻金幣於江
南先是平章遣典籤劉辰招諭國珍國珍與其下謀曰
方今元運將終豪傑並起惟江左號令嚴明所向無敵
今又東下婺州恐不能與抗況與我為敵者西有張士

誠南有陳友定莫若姑示順從藉為聲援以觀其變遂遣使奉書隨辰來獻黃金五十斤白金百斤金織文綺百端於是復遣使報之然國珍雖納歎其志尚陰持兩端也 戊午江南雄峯翼元帥王遇成孫茂先率兵攻臨安張士誠遣其右丞李伯昇來援茂先擊敗之伯昇斂兵退守茂先攻之不下引兵還僉院胡大海率兵攻諸暨州張士誠守將華元帥戰敗宵遁萬戶沈勝以衆降遂改諸暨州為諸全州嵊縣萬戶郝原請降於江南

二月甲子朔張士誠復犯江陰戰艦蔽江而下其將蘇同僉者駐兵君山坐胡牀東西指畫進軍狀江南守將吳良禦之戒諸將勿輕動頃之敵兵陳於江濱良命弟禎率一軍出北門與戰鋒纔交復遣元帥王子名率壯士出南門合擊之敵不能支遂敗擒其將陶元帥以下二百餘人溺水死者甚衆癸酉江南將邵榮攻湖州屢敗張士誠兵其將李伯昇斂兵退守攻之弗克乃還屯臨安辛巳樞密副使多爾濟以賊犯順寧命張

立將精銳由紫荆關出討命雅谷由北口出迎敵 甲申叛將梁炳攻辰州守將華善擊敗之以華善為湖廣行省參知政事 賊由飛狐靈丘犯蔚州 廵寅御史臺臣言先是召募義兵費用銀鈔一百四十萬錠多近侍權倖冒名闕支率為虛數乞命軍士凡已領官錢者立限出征詔從之已而不果行 是月詔博囉特穆爾移兵鎮大同以為京師捍蔽 置大都督兵農司仍置分司十道專督屯種以博囉特穆爾領之所在侵奪民

田不勝其擾台哈巴哈潰散之兵數萬鈔掠山西察罕
特穆爾遣陳秉直分兵駐榆次招撫之其首領悉送河
南屯種 三月癸巳朔陳友諒遣兵由信州畧衢州復
遣兵陷襄陽路 甲午江南下令宥獄囚 辛丑京城
北兵馬司指揮周哈喇岱與林智和等謀叛事覺伏誅
丁巳張士誠兵犯建德江南將朱文忠禦之於東門
使別將潛出小北門間道過鮑婆嶺由碧雞塢繞出其
陣後夾擊大破之其衆潰去 方國珍遣郎中張本仁

以溫台慶元三路獻於江南且以其次子閩為質平章
曰古者慮人不從則為盟誓盟誓不信變而為質予此
衰世之事豈可蹈之凡人之盟誓交質者皆由未能相
信故也今既誠心來歸便當推誠相與如青天白日何
自懷疑而以質子為哉乃厚賜闕而遣之闕後改名明
完 陳友諒遣其部將趙普勝寇寧國太平縣江南總
制胡惟賢命萬戶陳允同義士江炳叔率鄉兵五千擊
敗之獲糧一萬七千餘石普勝復寇陵陽石埭等縣僉

院張德勝與戰於柵江口復破走之。壬戌詔定科舉流寓人名額蒙古色目南人各十五名漢人二十名夏四月癸亥朔汾水暴漲賊陷金復等州司徒知樞密院事福嘉努調兵平之甲子毛貴為趙君用所殺帝以天下多故詔卻天壽節朝賀皇太子及羣臣屢請舉行如故帝卒不聽曰俟天下安寧行之未晚卿等其無復言癸酉江南兵復池州初趙普勝既陷池州令別將守之而自據樅陽水寨數往來寇掠境上元帥

徐達患其侵軼遣院判俞通海等往擊敗之俘其將趙牛兒等普勝棄舟陸走又擒其部將洪鈞等并獲艦艤數百艘遂復池州 江南僉院胡大海率元帥王玉等

攻紹興軍至蔣家渡遇張士誠兵擊敗之獲戰船五十餘艘又連戰於三山斗門白塔寺皆捷擒士誠卒五千

餘人恐其叛去悉斬於雙溪之上

據俞本
記事錄

張士誠復

犯建德駐兵大浪灘江南將朱文忠遣兵由烏龍嶺循胥口而上擊破之 廟辰江南叛將陳保二寇宜興守

臣楊國拒戰擒保二檻送寧越伏誅。張士誠復遣兵
爭建德據分水嶺朱文忠遣元帥何世明擊之破其營
斬首五百級餘衆悉潰。丁亥張士誠兵犯常州守將
湯和擊敗之擒卒千餘人。己丑賊陷寧夏路遂畧靈
武等處。張士誠將李伯昇寇婺源江南守將孫茂先
擊敗之。五月壬辰朔以陝西行臺御史大夫旺扎勒特
穆爾為陝西行省左丞相便宜行事。丁酉皇太子奏
請巡北邊以撫綏軍民御史臺臣上疏固留詔從之。

壬寅察罕特穆爾請今歲八月鄉試河南舉人及避兵
儒士不拘籍貫依河南省元定額數就陝州置貢院應
試從之 宋命江南行中書省平章政事朱元璋進為
行省左丞相承制封拜如故據劉辰國初事蹟修入 辛亥將還建

康召胡大海於紹興既至諭之曰寧越為浙東重地必
得其人守之吾以爾為才故特命爾守其衢處紹興進
取之宜悉以付爾宋巴延巴哈在衢州其人多智術實
茂伊遜守處州善用士紹興為張士誠將呂珍所據數

郡與寧越密邇爾宜與常遇春同心協力伺間取之此三人皆勍敵不可忽也仍命左右司員外侯原善都事

王愷管勾寧鳳綜理錢糧軍務事未幾有三人稱趙宋子孫請再命大海攻紹興願為內應丞相知其詐命法

司拷問乃張士誠使為間并其家屬誅之

趙宋子孫以下據國初事

蹟

山東河東河南及閩中等處飛蝗蔽天人馬不能

行所落溝壑盡平民大饑察罕特穆爾圖復汴梁是

月以大軍次虎牢先發遊騎南道出汴南畧歸亳陳蔡

北道出汴東戰船浮於河水陸並下畧曹南據黃陵渡乃大發秦兵出函關過虎牢晉兵出太行踰黃河俱會汴城下首奪其外城察罕特穆爾自將鐵騎屯杏花營諸將環城而壘劉福通屢出戰戰輒敗遂嬰城以守察罕特穆爾乃夜伏兵城南旦日遣苗軍跳梁者畧城而東敵傾城出追伏兵鼓譟起邀擊敗之又令弱卒立柵外城以餌敵敵出爭之弱卒佯走薄城西因縱鐵騎突擊悉擒其衆福通自是不敢出先是陳友諒弟友德

營於信州城東繞城植木柵急攻之已延巴哈迪音來
夜與賊廬戰糧竭矢盡而氣不少衰有大呼於城下者
曰有詔參謀哈嚕丹臨城問何來曰江西來哈嚕丹曰
如此乃賊耳吾元朝臣子豈受爾偽詔汝不聞張睢陽
事乎僞使者不答而去時軍民唯食草苗茶紙既盡括
鞚底煮食之又盡掘鼠羅雀及殺老弱以食然猶出兵
大破賊六月王奉國來攻城晝夜不息者踰旬已延巴
哈迪音登城麾兵拒之已而士卒力疲不能戰萬戶顧

馬兒以城叛城遂陷席閏出降大聖努哈嚕丹皆死之
巴延巴哈迪音力戰不勝遂自刎部將蔡誠盡殺妻子
與蔣廣奮力巷戰誠遇害廣為奉國所執愛廣勇敢使
之降廣曰我寧為忠死不為降生汝等草中一盜爾吾
豈屈汝乎奉國怒磔廣於竿廣大罵而絕時義兵陳受
戰敗為賊所擒亦痛罵不屈賊焚之先是巴延巴哈迪
音之援信州也嘗南望泣下曰我為天子司憲視彼城
之危急忍坐視乎吾知上報天子下拯生民餘皆無可

恤者所念者太夫人耳即日入拜其母鮮于氏曰兒今
不得事母矣母曰爾為忠臣吾即死何憾鮮于氏太常
典簿樞之女也已延巴哈迪音因命予額森巴哈奉其
母間道入福建以江東廉訪司印送行御史臺遂力守
孤城而死朝廷賜謚曰桓毅 甲子張士誠將呂珍圍
諸全州胡大海自寧越率兵救之珍堰水以灌城大海
奪堰反以灌珍珍勢蹙乃於馬上折箭求解兵大海許
之王愷謂大海曰彼猾賊難信不如因而擊之可大勝

也大海曰吾已許人而背之不信縱其去而擊之不武
遂引兵還 是月江南僉院俞通海攻趙普勝不克而
還諸將患之丞相曰趙普勝勇而寡謀陳友諒挾主以
令衆上下之間心懷疑貳用計以離之一夫之力耳時
普勝有門客頗通術數常為普勝畫策普勝倚為謀主
乃使人陽與客交而陰間之又致書與客故誤達普勝
普勝果疑客客懼不能安遂來歸於是厚待客客喜過
望傾吐其實盡得普勝平生所為乃重以金幣資客潛

往說友諒所親以間普勝普勝不知見友諒使者輒自言其功悻悻有德色友諒由是忌之 秋七月壬辰朔以遼陽賊勢張甚起前中書右丞相綽斯嘉為遼陽行省左丞相便宜行事 乙巳江南樞密院同僉常遇春率兵攻衢州建奉天旗樹柵圍其六門造呂公車仙人橋長木梯懶龍爪擁至城下高與城齊欲階之以登又於大西門大南門城下穴地道攻之守臣廉訪使宋巴延巴哈等悉力備禦以束葦灌油燒呂公車架千斤秤

鉤懶龍爪用長斧以斫木梯築夾城以防穴道遇春攻之弗克乃以奇兵出其不意突入南門甕城毀其所架砲督將士攻圍益急 戊申命國王襄嘉岱中書平章政事福嘉努額森巴哈知樞密院事赫哩等統領探馬赤軍進征遼陽 趙君用既殺毛貴貴黨續繼祖自遼陽入益都丙辰殺趙君用遂與其所部自相讎敵彭早住不知所終 是月以張士信為江浙行省平章政事 八月辛酉朔倪文俊餘黨陷歸州 庚午江南將朱

文遜秦友諒攻無為州取之 察罕特穆爾謀知汴梁
城中食且盡乃與諸將閻思孝李克彞呼勒齊等議各
分門而攻戊寅夜將士鼓勇登城斬關而入遂拔之劉
福通奉其主小明王從數百騎出東門遁走仍據安豐
獲偽后及賊妻子數萬偽官五千符璽印章寶貨無算
全居民二十萬軍無所私市不易肆不旬日河南悉定
獻捷京師以功拜河南行省平章政事兼知河南行樞
密院事陝西行臺御史中丞仍便宜行事詔告天下察

罕特穆爾既定河南乃以兵分鎮關陝荆襄河洛江淮而重兵屯太行營壘旌旗相望數千里日修車船繕兵甲務農積穀訓練士卒謀大舉以復山東己卯蝗自河北飛渡汴梁食禾一空九月癸巳以中書平章政事特里特穆爾為陝西行省左丞相便宜行事江南奉國上將軍徐達僉院張德勝率兵自無為州登陸夜至浮山寨擊趙普勝部將胡總管敗之於青山追至潛山界陳友諒遣參政郭泰渡沙河逆戰德勝復大破

之斬郭泰遂克潛山縣命詹元帥守之 乙未陳友諒殺其將趙普勝初友諒既忌普勝又有言普勝欲歸江南者及是憤潛山之敗友諒益欲殺普勝乃詐以會軍為期自至安慶圖之普勝不虞友諒之圖已聞其至具燒羊出迎於鴈汊登舟見友諒友諒遂執而殺之併其軍 乙巳以湖南北浙東西四道廉訪司之地皆陷詔任其所便之地置司 丙午夜白虹貫天 丁未江南兵取衢州路時同僉常遇春圍城兩月餘攻擊無虛日

樞密院判張斌度不能守密遣其下詣遇春約降是夕
斌潛出小西門迎大軍入城宋巴延巴哈不知其降猶
督兵拒戰俄而城中火起遇春等入城衆遂潰總管馮
浩赴水死宋巴延巴哈及院判多尼等被執改衢州路
為龍游府 甲寅江南遣博士夏煜授方國珍福建行
省平章參政國珉僉樞密分院事各給符印仍以所部
兵馬城守俟命征討煜至慶元國珍欲不受業已降欲
受之又恐見制乃詐稱疾但受平章印告老不任職遇

使者亦頗倨惟國珉開院署事 自中原喪亂江南漕
久不通至是河南始平乃遣兵部尚書巴延特移爾戶
部尚書曹履亨以御酒龍衣賜張士誠徵海運糧巴延
等至杭州傳詔令方國珍具舟以運而達實特穆爾總
督其事既而士誠慮國珍載粟不入京國珍又恐士誠
掣其舟乘虛襲已互相猜疑已延往來開諭二人乃奉
詔據吳寬平吳錄 冬十月庚申朔詔京師十一門皆築甕城
造吊橋 以方國珍為江浙行省平章政事 壬申江

南元帥俞廷玉率兵攻安慶不克卒於軍廷玉僉院通海父也。張士誠兵犯江陰江南守將吳良遣萬戶聶貴蔡顯率衆間道出無錫三山絕其後士誠兵遁去。

張士信既受江浙行省平章政事之命乃大發浙西諸郡民築杭州城分為三番以一月更代皆裹糧遠役而督事長吏復藉之酷斂鞭朴箠楚死者相望自七月興工至是月始畢僚屬立碑以紀其功比之南仲山甫識者嗤之。據元史及樂郊私語修入初嘉興通判繆思恭當張士信

來攻楊旺扎勒命典火攻官軍大捷及是城杭州士信檄
思恭統所屬工徒就役欲乘此僇辱之俾治西北面數
十百丈思恭每作則先人止則後衆勞來督罰殊得衆
心視他所築倍堅好士信亦無奈何一日巡工至其所
日已暮而工猶未輟士信曰日入而息何獨勞民如此
思恭曰平章禮絕百司猶日夕敬共王事況小民敢偷
餘晷士信曰此人口利如錐何怪杉青闢畔烈烈傷人
思恭曰今幸太尉革面國家借此得成獎順之典若念

杉青之役猶恨不力縱逸平章耳士信曰別駕好將息
言及杉青猶使人肉跳不止

採樂郊私語

十一月壬寅江

南兵取處州路初經畧使李國鳳至浙東承制拜寶茂
伊遜為江浙行省參知政事以守處州江南丞相既定
寧越即命耿再成駐兵縉雲之黃龍山謀取處州至是
金院胡大海帥師入境伊遜遣元帥葉琛屯桃花嶺參
謀林彬祖屯葛渡鎮撫陳仲賢照磨陳安屯樊嶺元帥
胡深守龍泉以拒敵久之右司郎中劉基棄官而歸伊

遜無可與謀者將士怠弛皆無鬪志

考異元史順帝紀
取處州在癸卯今

從明太祖實錄又實錄於此下云胡深叛伊遜間道來降具言處州兵弱易取胡大海聞之大喜云云錢氏辨證曰按神道碑與行述深出見大海在克處州之後而實錄則以為深間道來降乃獻謀取處州此大異也以實錄本傳考之似當從碑與行述胡公受實茂公國士之遇既解甲內附而又獻謀以取處州此穿窬小人之為而謂君子為之乎蘇伯衡撰繆美列傳云己亥十一月美從胡公擊處州軍據磬嶺其地險隘衆莫利先登美率敢死士持挺魚貫奮擊奪其壁以入我師守將石抹參政棄城而竄分兵畧定浮雲得元帥葉琛使諭元帥胡深深乃出降然則深之降在處州既下實茂棄城之後彰彰矣實茂既遁深不得已來降豈有背實茂來降復獻計取處之事哉此可以證實錄一時之謗白仲淵千載之誣矣今從錢說據碑傳修入不用實錄

海乃出軍抵樊嶺與再成合攻之連拔桃花嶺葛渡二砦進薄城下宜孫戰敗棄城走將士皆潰散遂克處州胡大海部將繆美分兵畧定諸縣得葉琛使諭胡深曰丞相天授也士之欲立功名者不以此時自附將誰與僇力且去年爾之衆戰而大敗今年我之師不戰而勝則天意亦可見矣與其阻險偷生旦夕何如改圖可以保富貴也深然之乃出降龍泉慶元皆平

葉琛諭降胡深事據蘇伯

衡所撰繆美列傳修入

戊申陳友諒兵陷杉閣十二月甲子

張士誠以分水縣之敗復遣其將陸元帥等據新城三
溪結寨數出寇掠江南元帥何世明擊破之斬陸元帥
以下千餘人分水兵潰去自是士誠不敢窺嚴婺 戊辰
江南丞相命僉院常遇春帥師攻杭州杭民尚奢侈無
蓄積時城門閉三月餘越數日米既盡糟糠亦與米價
等又數日糟糠亦盡以油車糠餅搗屑咬之至有合家
沈於水者城中之人飢死十六七採穀耕錄 知樞密院事
烏蘭哈岱領台哈巴哈軍其所部托克托與弟巴克勒穆

爾時保遼州烏蘭哈岱屯孟州是月與察罕特穆爾部
將巴布斯等交兵已而烏蘭哈岱獨引達勒達軍還京師
托克托等乃從察罕特穆爾先是陳友諒破龍興其
偽主徐壽輝欲徙居之友諒恐其來不利於己遣人止
其行壽輝不得已而止至是壽輝復欲往友諒仍遣人
止之壽輝不聽引兵發漢陽行次江州友諒陽遣使出
迎而陰伏兵於城西門外壽輝既入門閉伏發盡殺其
部屬以江州為都奉壽輝居之友諒自稱漢王立王府

於西門外置官屬自此事權一歸於文諒壽輝但擁虛位而已上都宮闈既廢是歲以後帝不復時巡帝在位久而皇太子春秋日盛軍國之事皆其所臨決皇后奇氏乃謀內禪遣資政院使巴布哈諭意於丞相太平太平不答皇后又召太平至宮中舉酒申前意太平終依違而已太子欲去之知樞密院事努爾噶聞而歎曰善人國之紀也苟去之國將何賴乎數於帝前左右之故太子之志不得逞會努爾噶卒太子遂決意去太

平以中書左丞成遵及參知政事趙中皆太平所用兩
人去則太平之黨孤於是監察御史瑪珠僧格實哩承
望風旨嗾寶坻縣尹鄧守禮弟子初等誣告遵中與參
議蕭庸等六人皆受贓太子命御史臺大宗正府等官
雜問之鍛鍊使成獄遵等皆杖死中外冤之太平知勢
不可留數以疾辭位後數年御史臺臣辯明遵等誣枉
詔給還所授宣敕初江南行臺御史大夫納琳赴召
由海道入朝抵黑水洋阻風而還至是復由海道趣直

沾山東俞寶率戰艦斷糧道納琳命其子安安及同舟

人拒之破其衆於海口遂抵京師帝遣使勞以上尊皇

太子亦饋酒脯而納琳感疾日亟卒於通州年七十有九京師有鴟鴞百羣夜鳴至曉連月乃止居庸關子

規啼

二事據庚申
外史修入

錢清場鹽司會稽楊維楨遷江西

儒學提舉未上值兵亂避地杭州張士誠聞其名欲見之維楨謝不往復書斥其所用之人其畧曰閣下乘亂起兵首倡大順以獎王室淮吳之人萬口一辭以閣下

之所為有今日不可及者四兵不嗜殺一也聞善言則
拜二也儉於自奉三也厚給吏祿而奸貪必誅四也此
東南豪傑望閣下之可與有為者也然賢人失職四民
失業者尚不少也吾惟閣下有可畏者又不止是動民
力以搖邦本用吏術以括田租銓於私人不承制出納
國廩不輸受降人不疑任忠臣而復貳也六者之中有
其一二可以喪邦閣下不可以不省也况為閣下之將
帥者有生之心無死之志矣為閣下之守令者有奉上

之道無恤下之政矣為閣下之親族姻黨者無祿養之
法有行位之權矣有假佞以為忠者有託詐以為直者
有飾貪虐以為廉良者閣下信佞為忠則臣有斬尚
者用矣信詐為直則臣有趙高者用矣信貪虐為廉良
則蹠蹠者進隨夷者退矣又有某繡使拜虜而乞生某
太守望敵而先退閣下禮之為好人養之為大老則死
節之人少賣國之人來矣是非一謬黑白俱紊天下何
自而治乎及觀閣下左右參議贊密者未見其破切政

病規進閣下於遠大之域者使閣下有可為之時有可乘之勢而訖無有成之效其故何也為閣下計者少而為身謀者多也閣下身犯六畏釁隙多端不有內變必有外禍不待智者而後知也閣下狃於小安而無長慮東南豪傑又何望乎僕既老且病爵祿不干於閣下惟以東南切望於閣下幸采而行之毋蹈羣小誤人之域則小伯可以為錢鏐大伯可以為晉重耳齊小白也否則麋鹿復上姑蘇臺始憶楊維子之言於乎晚矣衆惡

其切直目為狂生時四境日蹙朝廷方倚達實特穆爾

為保障而納賄不已維楨上書諷之由是不合久之乃

徙居松江

採貝闕楊
鐵崖傳

二十年春正月己丑朔察罕特穆爾請以鞏縣改立軍
州萬戶府招民屯種從之 御史大夫樂迪斯中丞糾
珠奏今後各處從宜行事官員毋得陰挾私讐明為舉
索輒將風憲官吏擅自遷除侵擾行事沮壞臺綱從之
己亥夏煜自慶元還建康言方國珍奸詐狀非兵威

無以服之丞相曰吾方致力姑蘇未暇與校乃遣都事
楊憲傳仲章往諭之曰及今能滌心改過不負初心則
三郡之地庶幾可保不然吾恐汝兄弟敗亡妻子為僇
徒為人所指笑也國珍不省時宋龍鳳六年也癸卯
大寧路陷乙卯會試舉人知貢舉平章政事巴圖瑪
實哩同知貢舉翰林學士承旨李好文禮部尚書許從
宗考試官國子祭酒張翥同考試官太常博士傅亨等
奏舊例各處鄉試舉人三年一次取三百名會試取一

百名今歲鄉試所取比前數少止有八十八名會試三分內取一分合取三十名如於三十名外添取五名為宜從之

丙辰五色雲見移時

是月張士誠破濠州

遣其將李濟據之

據平吳錄

尋又破泗徐邳等州

據王逢梧溪集

二月戊午朔中書左丞相太平罷為太保俾養疾於家
御史臺臣奏言當時事之艱危正賴賢材之宏濟太平
以師保兼相職為宜帝不能從會陽翟王阿魯輝特穆爾倡亂騷動北邊勢逼上都皇太子乃言於帝命太平

留守上都實欲置之死地太平遂往有同知太常院事
托歡者太平子額森呼圖故將也聞陽翟王將至乃引
兵縛王至軍前太平不受令生致閩下北邊遂寧初努
爾噶卧病謂人曰我病固不起而太平亦不能久於位
可歎也至是其言乃驗 庚申福建行省參政袁天祿
遣古田縣尹林文廣以書納欵於江南時義兵萬戶賽
斧丹阿里默丹據泉州陳友諒兵入杉關攻邵武汀州
延平諸郡縣羣盜乘勢竊發閩地騷動天祿知國勢不

振故遣文廣由海道來納款而福清州同知張希伯亦
遣人請降丞相皆厚賞之遣還招諭 是月江南將徐
達克高郵尋復失之

據俞本
記事錄

三月戊子朔田豐陷保

定路 豐見東方 江南改淮海翼為江南等處分樞

密院以繆大亨同僉院事總制軍民大亨有治才寬厚
不撓多惠愛及人至於禁戢暴強割折獄訟皆當其情
民甚悅之 甲午廷試進士三十五人賜瑪珠魏元禮
等及第出身有差 乙巳冀寧路陷 壬子復拜遼陽

行省左丞相綽斯嘉為中書右丞相時帝益厭政而宦者朴巴哈乘間用事為姦利綽斯嘉因與結構相表裏四方警報及將臣功狀皆壅不上聞是月江南徵青田劉基龍泉章溢麗水葉琛金華宋濂至建康初丞相至婺州既召見濂及克處又有薦基及溢琛者即遣使以書幣徵之時總制孫炎先奉命聘基使者再往反不起炎為書數千言陳天命以諭基基乃與三人者同至入見丞相甚喜賜坐從容問曰四海分爭何時而定溢

起對曰天道無常惟德是輔不嗜殺人者能一之丞相
稱善基陳時務十八事且言明公因天下之亂掘起草
昧間尺土一民無所憑藉名號甚光明行事甚順應此
王師也我有兩敵陳友諒居西張士誠居東友諒包饒
信跨荆襄幾天下半而士誠僅有邊海地南不過會稽
北不過淮揚首鼠竄伏陰欲背元陽則附之此守虜耳
無能為也友諒劫君而脅其下下皆乖怨性剽悍輕死
不難以其國嘗人之鋒然實數戰民疲下乘則不驩民

疲則不附故漢易取也夫攫獸先猛擒賊先強今日之計莫若先伐漢漢地廣大得漢天下之形成矣丞相大悅稱先生而不名初基之棄官而歸也集鄉黨以自保避方國珍之亂者多依以居或說以勾踐事業基笑曰生平惡國珍士誠輩所為今乃效尤可乎天命行有屬予姑待之及婺處已定基置酒延客指乾象示曰此豈人力也耶會孫炎使數至乃來謁既見退謂人曰天星數驗真可附也願委身事之考異劉文成行狀云公與魯道元字文公諒日繼酒

游西湖一日有異雲起西北二人以為慶雲將賦詩公大言曰天子氣也應在金陵十年後英主出其下我當輔之撰明史者無不取以為美談錢氏實錄辨證曰按劉文成以至正十一年為江浙儒學副提舉十月辭疾歸十二年以浙東元帥府都事從納琳哈喇築慶元城十三年以行省都事從特哩特穆爾招諭方氏與朝議不合羈管紹興十六年行省復以都事起公與實茂謀括寇十七年實茂伊遜總制處州分院治處以公為其院經歷又辟郡人胡深葉琛章溢參謀其軍事用公等謀盡平處益十八年我兵取蘭谿且逼婺實茂遣胡深等救婺不克上既定婺即命耿再成駐兵縉雲以規取處實茂遣胡深等分屯以拒王師公雖不在行間然未嘗不在實茂院中實茂蓋倚之以謀我師也實錄本傳云改行枢密院經歷與實茂守處州以拒國珍當是時實茂與耿泗國對壘於黃龍樊嶺間其所拒者非國珍也國史糾其詞耳元史是年經畧使李國鳳至浙東承

制拜宜孫為江浙行省參知政事行狀載公遷右司郎中李國鳳上其功不錄則公之遷右司郎中亦國鳳承制拜之也明年己亥十二月我兵取處而實茂棄城去矣公久在實茂院中其棄官歸青田山中或在實茂未敗之先要亦不甚相遠也李國鳳經畧江南上公之功在十八年十二月王師克婺之後行狀實錄本傳俱云棄官逃歸青田山中以其時考之當在十九年春夏間去實茂敗時無幾也方孝孺撰孫炎傳云上克處方欲用人而秀民有能才者皆伏匿山中不肯出炎鈞致二人錄其姓名為書遣使者招之而劉基葉琛章溢尤為處士所推基最有名豪俠勇氣以為不當為他人用使者再往反不起以一寶劍奉炎炎作詩封還之為書數千言闡諭天命基無以答遂巡就見炎遂致基於京師又蘇伯衡撰繆美傳云處州既下龍泉慶元皆平遂以胡深葉琛劉基入見處平之後公遷延避匿待孫炎輩鈞致久之始入見非獨以仕元日久不欲輕為我

用亦不忍負實茂也讀覆既集與實茂倡和詩公之心
事二百年後可以想見行狀載西湖見慶雲謂金陵有
天子氣我當輔之及上取金華指乾象示人之云云吾
以為皆佐命之後其門人子弟從而為之辭非公之本
心也封誠意伯語云朕提師江左兵至括蒼挺身來謁
於金陵歸謂人曰天星數驗真可附也願委身事之於
是鄉里順化封宏文館學士語云當是時括蒼之民尚
未深信爾老鄉一至山越清寧公之事我太祖傾心佐
命蓋在金陵謁見之後太祖之知公深矣為著其梗概
如此今削去行狀西湖占雲之說及明初野史附會云
預知為金陵佐命者一槩不錄其指乾象示人之言則
與封伯誥辭天星數驗相符殆非行狀附會故仍取之

江南丞相呂常遇春於杭州遇春之出師也丞相戒
之曰克敵在勇全勝在謀昔閩侯號萬人敵為呂蒙所

破為無謀也爾宜深戒之及攻杭州戰數不利元帥劉
宣固岱及掾史商尚質皆戰死城不得下故遣使召還
夏四月庚申命大司農司都事樂元臣招諭田豐至
其軍為豐所害辛未僉行樞密院事張居敬復興中
州五月丁亥朔日有食之雨雹乙未陳友諒將羅
忠顯陷辰州帝欲修上都宮闕工役大興參議中書
省事陳祖仁上疏諫止其畧曰上都宮闕創自先帝修
於累朝自經兵火焚燬殆盡所不忍言此陛下所為日

夜痛心亟圖興復者也然今四海未靖瘡痍未瘳倉庫告虛財用將竭乃欲驅疲民以供大役廢其耕耨而荒其田畝何異扼其吭而奪之食以速其斃乎陛下追惟宮闈念茲在茲然不思今日所當興復乃有大於此者假令上都宮闈未復固無妨於陛下之寢處使因是而違天道失人心或致大業之隳廢則夫天下者亦祖宗之天下生民者亦祖宗之生民陛下亦安忍輕棄之乎願陛下以愛養民力為本以恢復天下為務信賞必罰

以驅策英雄親正人遠邪佞以圖謀治道夫如是則承
平之觀不日咸復詎止上都宮闈而已乎疏奏帝嘉納
之 是月張士誠海運糧十一萬石至京師由是方面
之權悉歸士誠丞相達實特穆爾戶位而已 陳友諒
兵寇池州江南將徐達等擊敗之初友諒既殺趙普勝
即有窺池州之意丞相察知之遣使謂達與常遇春曰
友諒兵旦暮且至爾當以五千人守城遣萬人伏九華
山下俟彼兵臨城城上揚旗鳴鼓發伏兵往絕其後破

之必矣至是友諒兵果至其鋒甚銳直造城下城上揚
旗鳴鼓伏兵悉起緣山而出循江而下絕其歸路城中
出兵夾擊大破之斬首萬餘級生擒三千餘人遇春欲
盡殺之徐達不從遂以聞丞相遣使諭諸將令釋之以
為後用至則遇春已殺之止存三百人丞相聞之不懌
命悉放還閏月丙辰朔陳友諒率舟師攻太平守將
樞密院判花雲與朱文遜等以兵三千拒戰文遜死之
友諒攻城三日不得入乃引巨舟迫城西南士卒緣舟

尾攀堞而登城遂陷雲被執縛急怒罵曰賊奴爾縛吾
吾主必滅爾斬爾為贖也遂奮躍大呼而起縛皆絕奪
守者刀連斬五六人賊怒縛雲於舟檣叢射之雲至死
罵賊不絕口院判王鼎知府許瑗俱為友諒所執亦抗
罵不屈皆死之雲自濠州隸麾下每戰輒立奇功因命
宿衛常在左右至是出守太平遂死於難年三十九妻
郜氏一子煥生始三歲戰方急郜氏會家人抱兒拜家
廟泣謂家人曰城且破吾夫必死夫死吾寧獨生然花

氏惟此一兒為我善護之雲被執郜氏赴水死侍婢孫
氏收其屍葬之抱兒欲逃他所為友諒兵所虜文遜丞
相養子也瑗饒州樂平人鼎初為院判儀真趙忠養子
襲忠職守太平尋復姓王氏至是與雲並死於難其後
追封雲為東平郡侯瑗高陽郡侯鼎太原郡侯立忠臣
祠於太平命有司歲時致祭 戊午陳友諒殺其主徐
壽輝而自立友諒之犯太平也挾壽輝以行及太平既
陷急謀僭竊乃於采石舟中使人詣壽輝前佯為白事

令壯士持鐵鎚自後擊之碎其首壽輝死友諒遂以采

石五通廟為行殿稱皇帝國號漢改元大義仍以鄒普

勝為太師張必先為丞相張定邊為太尉羣下立江岸

草次行禮值大雨至冠服皆濡濕畧無儀節

考異按支
諒殺主在

太平陷後元史順帝紀以其事繫五月丁亥朔日食之下誤也今從明太祖實錄

庚申陳友

諒遣人約張士誠同侵建康士誠未報友諒自采石引

舟師東下建康大震獻計者或謀以城降或以鍾山有

王氣欲奔據之或言決死一戰戰不勝走未晚也獨劉

基張目不言丞相心非諸將議乃召基入內問計基曰
先斬主降及奔鍾山者乃可以破賊丞相曰先生計將
安出基曰天道後舉者勝吾以逸待勞何患不克明公
若傾府庫以興士怒開至誠以固人心伏兵伺隙擊之
取威制勝以成王業在此舉也丞相意益決或議先復
太平以牽制之丞相曰不可彼據吾上游舟師十倍於
我順流而下猝難禦也或又勸自將擊之丞相曰此亦
不可敵知我出門以偏師緩我我欲與戰彼不交鋒而

以舟師順流直趣建康半日可達吾步騎亟回非一日不至縱能得達百里趨戰兵法所忌皆非良策也吾有一計足以破之於是召指揮康茂才諭之曰有事命汝能之乎茂才曰惟所命丞相曰汝舊與友諒游今友諒入寇吾欲速其來非汝不可汝今作書偽降約為內應且使分兵三道以弱其勢茂才曰諾家有老闖舊嘗事友諒使齎書以往必信無疑丞相以其謀語李善長善長曰方憂寇來何為更誘致之丞相曰失今不為使二

寇相合吾何以支今先破此賊則東寇膽落矣遂遣閻
者乘小舸徑至友諒軍友諒得書甚喜問康公今何在
閻者曰見守江東橋又問橋何如曰木橋也乃與酒食
遣還謂曰歸語康公吾即至至則呼老康為驗閻者諾
歸具以告丞相喜曰賊入吾彀中矣乃命善長夜撤江
東橋易以鐵石比旦橋成有富民自友諒軍中逸歸者
言友諒問新河口道路即令張德勝跨新河築虎口城
以守之命馮國勝常遇春率帳前五翼軍三萬人伏石

灰山側徐達等陳兵南門外楊璟駐兵大勝港張德勝
朱虎率舟師出龍江關外丞相總大軍屯盧龍山令持
幟者偃黃幟於山之左偃赤幟於山之右戒曰寇至則
舉赤幟舉黃幟則伏兵皆起各嚴師以待乙丑友諒舟
師至大勝港楊璟整兵禦之港狹僅容二舟入友諒以
舟不得並進遽引退出大江徑衝江東橋見橋皆鐵石
乃驚疑連呼老康老康無應之者始知閻者之紿已即
與其弟號五王者率舟千餘向龍灣先遣萬人登岸立

柵其勢銳甚時酷暑丞相衣紫茸甲張蓋督兵見士卒
流汗命去蓋衆欲戰丞相曰天將雨諸軍且就食當乘
雨擊之時天無雲人莫之信忽雲起東北須臾雨大注
赤幟舉下令拔柵諸軍競前拔柵友諒麾其軍來爭戰
方合而雨止命發鼓鼓大震黃幟舉馮國勝常遇春伏
兵起徐達兵亦至張德勝朱虎舟師並集內外合擊友
諒軍披靡不能支遂大敗潰兵走登舟值潮退舟膠淺
猝不能動殺溺死者無筭俘其卒二萬餘人其將張志

雄梁鉉喻興劉世衍等皆降獲巨艦百餘艘友諒乘別
舸脫走於其所棄舟卧席下得茂才所遺書丞相笑曰
彼愚至此誠可嗤也張志雄者本趙普勝部將善戰號
長張嘗怨友諒殺普勝故龍灣之戰無鬪志及降言於
丞相曰友諒之東下盡撤安慶兵以從今之降卒皆安
慶之兵友諒既敗走安慶無守禦者丞相乃遣徐達馮
國勝張德勝等將兵追友諒又命元帥余某等將兵取
安慶德勝追及友諒於慈湖縱火焚其舟至采石又與

大戰德勝死焉國勝以五翼軍蹴之友諒與其將張定
邊出皂旗軍號黑旋風者迎戰又敗之友諒晝夜不得
息遂收餘兵棄太平遁去達帥舟師追至池州而還俞
元帥遂進取安慶守之友諒還至江州據以為都德勝
廬州梁縣人也 戊寅江南兵取信州路初友諒之寇
龍江也丞相命胡大海直擣信州以牽制之大海遣元
帥葛俊率兵以往道過衢州都事王愷止俊乘駒至金
華謂大海曰廣信為友諒門戶彼既傾國入寇寧不以

重兵為守非大將統全軍以臨之不可今偏師嘗敵設
若挫衄非獨廣信不可下吾衝先驛騷矣大海然之乃
親率兵攻信州至靈溪城中步騎數千出迎戰大海擊
敗之督兵攻城守者不能禦衆潰遂克之先是招安郡
縣將士皆徵糧於民名之曰寨糧民甚病焉大海以聞
丞相亟命罷之 六月己丑命博羅特穆爾部將托克
托守禦嵐興保德州等處又詔今後察罕特穆爾與博
羅特穆爾部將毋得互相越境侵犯所守信地因而讐

殺托克托不得出嵐興界博囉特穆爾亦不得侵其地

辛亥江南更築太平城初太平城俯瞰姑溪故陳友諒舟師得緣尾攀堞而登至是常遇春復太平乃移城去姑溪二十餘步增置樓堞守禦遂固
婺州之失也

實茂伊遜弟厚孫并其母為江南所獲令以書招伊遜伊遜不至及破處州伊遜將數十騎出走至建寧聚兵欲圖恢復而所至人心已散知事不可為歎曰處州吾所守也今吾勢已窮無所於往不如還處州境死亦為

處州鬼耳遂以兵攻慶元縣耿再成擊敗之伊遜衆潰走竹口欲還福建道經桃花坑為鄉兵葉月巖等所邀擊伊遜力戰而死其部將李文彥收其屍葬於龍泉都事孫炎以聞丞相嘉其盡忠死事遣使祭之復處州民所立生祠朝廷贈伊遜集賢大學士追封越國公謚忠愍張士誠遣其將呂珍率舟師自太湖入陳瀆港分兵三路寇長興江南守將耿炳文禦之遣左副元帥劉成出五里牌總管湯泉出蔣婆橋張珙出下新橋泉珙

皆戰死成與相拒一晝夜炳文乃親率精兵與成合遂
大敗之獲甲仗船艦甚衆

資治通鑑後編卷一百七十九

欽定四庫全書

資治通鑑後編卷一百八十

刑部尚書徐乾學撰

元紀二十八

起上章因敦七月盡玄默攝提格十二月凡二年有奇

順帝

至正二十年七月辛酉博羅特穆爾大敗賊王士誠於臺州乙丑陳友諒浮梁守將于光等遣人以其縣降於江南乙亥詔博羅特穆爾總領達達罕爾軍馬為

總兵官仍便宜行事。八月戊子命博囉特穆爾守石嶺關以北博囉特穆爾守石嶺關以南。乙未永平路陷。甲辰詔諸處所在權攝官員專務漁獵百姓今後非朝廷允許不得之任。庚戌詔江浙行省左丞相達實特穆爾加大尉兼知江浙行樞密院事提調行宣政院事便宜行事。九月乙卯朔詔遣參知政事額森巴哈等往諭博囉特穆爾察罕特穆爾令講和時博囉特穆爾調兵自石嶺關直抵冀寧圍其城三日復退屯交

城察罕特穆爾調參政閻奉先引兵與戰已而各於石
嶺關南北守禦 壬戌賊陷孟州又陷趙州攻真定路
癸未賊復犯上都右丞蒙克特穆爾引兵擊之敗績
監察御史張楨劾太尉阿吉瑪欺罔之罪并副使托
克托穆爾治書侍御史婁努弄權誤國之罪不報時博羅
特穆爾與察罕特穆爾方爭晉冀朝廷遣額森巴哈及
托克托穆爾婁努往解之既受命不前進楨又言其貪懦
庸鄙苟懷自安之計無憂國致身之忠朝廷將使二家

釋憾協心討賊此國之大事謂宜風馳電走而乃迂回
退攝枉道延安以西繞曲數千里遲遲而行使兩軍日
夜仇殺黎庶肝腦塗地實此二人之所致也宜急殛之
以救時危亦不報楨乃慨然歎曰天下事不可為矣即
辭去居河中安邑山谷間結茅僅容膝有訪之者不復
言時事但對之流涕而已 是月張士誠兵侵諸全州
江南元帥袁實戰死 黃岡人歐普祥故徐壽輝將也
性殘暴所過室廬皆焚蕩俘掠無遺壽輝使守袁州陳

友諒弑壽輝徵兵於普祥普祥不聽其節制乃以袁州降於江南友諒聞之遣其弟友仁攻袁州普祥與部將劉仁黃彬擊敗其衆獲友仁鞭而囚之友諒懼遣其太師鄒普勝與普祥和約各守其境普祥乃釋友仁歸

襄樊 詔博羅特穆爾守冀寧博羅特穆爾遣保保等倍道趨之守者不納己亥察罕特穆爾遣陳秉直等以兵攻博羅特穆爾之軍於冀寧博羅特穆爾軍戰敗時

有旨以冀寧卑博羅特穆爾察罕特穆爾以為用兵數年惟藉冀晉以給其軍而致盛強苟奉旨與之則彼得以足其兵食乃託言用師汴梁尋渡河就屯澤潞拒之調延安軍交戰於東勝州等處再遣巴布斯以兵援之巴布斯謂彼軍奉旨而來我何敢抗王命察罕特穆爾怒殺之 十一月甲寅朔黃河清凡三日 博羅特穆爾以兵侵汾州察罕特穆爾以兵拒之 癸酉賊犯易州 十二月辛卯廣平路陷 是歲陽翟王阿魯輝特

穆爾擁兵數十萬屯於穆爾固徹烏之地將犯京畿使
來言曰祖宗以天下付汝汝已失其大半若以國璽付
我我當自為之帝遣報之曰天命有在汝欲為則為之
命知樞密院事圖堅特穆爾等將兵擊之不克致師大
潰圖堅特穆爾走上都 關先生沙劉二破頭瀋兵入
高麗王都王出奔耽羅其臣納女請降將校皆以女子
配之軍士遂與高麗為姻姪恣情往來高麗人因而各
藏其馬林中一夕傳王令除高麗聲音者不殺其餘並

殺之關先生沙劉二皆死惟破頭潘及裨將左李率輕騎萬人從間道直走西京降博囉特穆爾聽其調遣已而又降於庫庫特穆爾此事據庚申外史修入

二十一年春正月癸丑朔詔赦天下 命中書平章政事達實特穆爾參知政事七十往諭博囉特穆爾罷兵還鎮復遣使往諭察罕特穆爾亦令罷兵而丞相綽斯嘉與資正院使朴巴哈贖貨無厭視南北兩家賂遺厚薄而啗之以密旨南之賂厚則謂北曰上有密旨令汝

併北而有之北之賂厚則謂北曰上有密旨令汝併南
而有之由是構怨日深兵終不解 乙丑河南賊犯杞
縣察罕特穆爾討平之 丁卯李思齊進兵平伏羌等
縣 癸酉石州大風拔木六畜俱鳴民所持槍忽生火
焰抹之即無搖之即有 是月宋封江南行中書省左
丞相朱元璋為吳國公承制封拜如故時龍鳳七年也
吳院判朱亮祖率兵擊陳友諒平章王溥於饒州安
仁之石港不利而還 吳元帥朱文輝及饒州降將余

椿等引兵次池之建德令元帥羅友賢攻東流賊壘擒其將李茂仲文輝又追襲其守將趙同僉走之二月甲申同僉樞密院事薩哩特穆爾復永平灤州等處吳始議立鹽法置局設官以掌之令商人販鬻二十分而取其一以資軍餉己丑察罕特穆爾駐兵霍州攻博羅特穆爾己亥吳置寶源局於應天府鑄大中通寶錢使與歷代錢兼行以四百為一貫四貫為一兩四文為一錢其物貨價直一從民便丙午吳議立茶法

凡產茶郡縣並令征之其法官給茶引付諸產茶郡縣
凡商人買茶具數赴官納錢請引方許出境貿易每茶
一百斤輸錢二百郡縣籍記商人姓名以憑勾稽巴
薩特穆爾以廉訪使久居廣東專恣自用詔以旺扎勒圖
等為廉訪司官而除巴薩特穆爾為江南行臺侍御史
巴薩特穆爾不受命盡殺旺扎勒圖等唯廉訪使董鑰哀
請得免三月癸酉察罕特穆爾調兵討永城縣又駐
兵宿州擒賊將梁綿住泗州守將薛顯以城降於吳

先是江南行省遣夏煜往諭方國珍戊寅國珍使者來謝且以金玉飾馬鞍輿獻吳國公曰吾今有事四方所需者文武材能所用者粟米布帛其他寶玩非所好也却其獻是月張士誠海運糧十一萬石至京師博羅特穆爾罷兵還遣托律拜等引兵據延安以謀入陝張良弼出南山義谷駐藍田受節制於察罕特穆爾良弼又陰結陝西行省平章鼎珠聽丞相特里特穆爾調遣營於鹿臺察罕特穆爾聞而銜之張士信修宋

鄂王岳飛精忠廟率僚佐致祭仍令郡守謝節經理其

墓田

據陳基修忠廟碑

夏四月辛巳朔日有食之 是月以

張良弼為陝西行省參知政事

察罕特穆爾遣其子

副詹事庫庫特穆爾貢糧至京師皇太子親與定約遂

不復疑庫庫本察罕甥也姓王氏名保察罕養以為

子 五月四川明王珍陷嘉定等路李思齊遣兵擊敗

之 乙亥察罕特穆爾以兵侵博囉特穆爾所守之地

是月李思齊受李武崔德等降 吳命同僉朱文忠

城嚴州時杭州為張士誠所據距嚴密邇故築城為守備陳友諒將李明道犯信州聞吳將胡大海在浙東懼其來援乃遣兵據玉山之草平鎮以拒敵夏德潤出兵爭之遂戰死六月乙未熒惑歲星太白聚於翼察罕特穆爾謀知山東羣賊自相攻殺而濟寧田豐降於賊欲總兵討之丙申輿疾自陝抵洛大會諸將與議師期發并州軍出并陘遼沁軍出邯鄲澤潞軍出磁州懷衛軍出自馬及汴洛軍水陸俱下分道並進而自率

鐵騎建大將旗鼓渡孟津踰覃懷鼓行而東復冠州東
昌丙午吳雄峰翼元帥王思義克番陽之利陽鎮遂
會鄧愈兵攻浮梁李明道攻信州益急吳守將胡德
濟以兵少閉城固守遣人求援於胡大海大海即率兵
由靈溪以進德濟乃引兵出城與明道戰大海縱兵夾
擊大破之擒明道及其宣慰王漢二送朱文忠漢二溥
之弟也文忠令為書以招溥復送之建康吳國公皆仍
其舊職用為鄉道以取江西秋七月甲子吳國公以

范常為太平府知府諭之曰太平吾股肱郡其民數罹
兵革疲勞甚矣今命爾往當有以安輯之使各得其所
庶幾盡職常滁州人也 已巳忻州西北有赤氣蔽天
如血 壬申陳友諒知院張定邊陷安慶吳守將余元
帥等戰敗奔還建康吳國公怒皆斬之 吳國公視事
東閣坐久更衣衣皆經滌濯者參軍宋思顏曰主公儉
德誠無以加真可示法於子孫第恐今日如此而後或
不然耳願始終無二公賜帛以旌其直思顏又曰近句

容獲虎令豢養民間飼之以犬無益也公即命取二虎
并一熊殺之分賜百官 八月甲申吳將鄧愈克浮梁
陳友諒守將侯邦佐等棄城走院判于光復攻樂平州
友諒總管蕭明率衆拒戰光擊敗擒之遂克樂平 吳
將胡大海率兵攻紹興部將張英恃勇輕進至城下遇
伏兵被執死之大海圍城久不下乃引還 乙酉大同
路北方夜有赤氣蔽天移時方散 先是朱文忠送李
明道至吳國公問陳氏何如明道具言友諒弑主將士

離心且政令不一擅權者多驍勇之將如趙普勝者又忌而殺之雖有衆不足用也及安慶之陷公遂決意伐之召諭諸將各厲士卒以從徐達進曰師直為壯今我直而彼曲焉有不克劉基亦言於公曰昨觀天象金星在前火星在後此師勝之兆願主公順天應人早行弔伐公於是命徐達常遇春等先發庚寅親率舟師以進乘龍驤巨艦建大旗於前署曰弔民伐罪納順招降諸軍溯流而上友諒江上斥候望風奔遁戊戌至安慶敵

固守不戰公以陸兵疑之乃命廖永忠張志雄以舟師擊其水寨破敵舟八十餘艘遂復安慶長驅至小孤山友諒守將傅友德及丁普郎迎降壬寅次湖口遇友諒舟出江偵邏命常遇春擊之敵舟退走乘勝追至江州友諒親率兵督戰公分舟師為兩翼夾擊友諒大破之獲其舟百餘艘友諒窮蹙夜半挈妻子棄城走武昌癸卯公入江州獲馬二千餘匹糧數十萬復遣徐達進兵追之達聞友諒欲出汎陽戰艦來拒戰乃屯沌口以遏

之甲辰吳遣兵攻南康克之改為西寧府又分遣將士畧各城之未下者東流蘄黃廣濟饒州相繼降附

吳花雲家侍婢孫氏與雲子璋被虜在江州友諒軍中惡兒啼孫恐兒見害以簪珥屬兒漁家育之及友諒敗孫脫身至漁家見兒遂竊負之夜出宿陶穴中明日出江滸僦舟以渡適友諒潰卒還爭舟猝孫及兒投之江方出沒波中有斷木自上流至孫挾兒附木浮入蘆渚中渚有蓮實孫取啗兒凡七日得不死忽夜半聞人呼

之一老父命與俱行得達吳國公所公聞其為花雲兒
也即呼入見孫氏抱兒拜且泣公亦泣置兒膝上曰此
花雲兒將種也命賜老父衣老父已不見追之無所得
衆以為神云燁既長命為水軍衛指揮僉事俾以雲平
日所服衣冠葬上元縣南五十里 是月察罕特穆爾
率師至鹽河遣其子庫庫特穆爾及諸將闔思孝等會
闕保呼琳齊軍由東河造浮橋以濟賊以二萬餘衆奪
之闕保呼琳齊且戰且渡遂拔長清以精卒五萬擣東

平東平偽丞相田豐遣崔世英等出戰大破之斬首萬餘級直抵其城下察罕特穆爾以田豐據山東久軍民服之乃遺書諭以順逆之理豐與王士誠皆降遂復東平濟寧令豐為前鋒從大軍東討時察罕特穆爾猶未渡河羣賊皆聚於濟南而出兵齊河禹城以相抗察罕特穆爾分遣奇兵間道出賊後南畧泰安逼益都北徇濟陽章丘中取瀕海郡邑乃自將大軍渡河與賊將戰於分齊大敗之棣州兪寶東昌楊誠皆降魯地悉定吳

國公聞之遣使與察罕特穆爾通好謂左右曰察罕雖
假義師圖恢復乃與博囉兵爭不解屢格君命此豈忠
臣之為乎又聞其好名如田豐為人傾側察罕待如心
腹則闇於知人矣古之名將洞察幾微智謀宏遠使人
不可測度察罕豈知此乎吾今遣人往與通好觀其所
處何如然後議之 九月辛亥陳友諒建昌守將王溥
等降於吳 甲寅吳星源翼判官俞茂功德興克之
戊午陽翟王阿嚕輝特穆爾伏誅 壬戌四川賊兵陷

東川郡縣李思齊調兵擊之。壬申命博羅特穆爾於保定以東河間以南從便屯種。是月命兵部尚書薩徹巴哈侍郎韓祺徵海運糧於張士誠時楊維楨避地松江士誠以厚幣招致維楨勉行至姑蘇適詔使以御酒賜士誠維楨飲酒遂賦詩曰江南歲歲烽煙起海上年年御酒來如此烽煙如此酒老夫懷抱幾時開士誠聞之默然遂不強留聽之歸據張氏事
蹟修入冬十月癸巳絳州有赤氣見北方如火察罕特穆爾進兵逼濟南

城而齊河禹城皆來降南道諸將亦報捷再敗益都兵
於好石橋東至海濱郡邑聞風皆送款攻圍濟南城二
月城乃下詔拜中書平章政事兼知河南山東行樞密
院事陝西行臺中丞如故察罕特穆爾令參政陳秉直
劉珪守禦河南而自駐山東移兵圍益都環城列營凡
數十大治攻具百道並進賊悉力拒守察罕特穆爾復
掘重塹築長圍遏南洋河以灌城中城中益困 十一
月戊午吳國公命參政常遇春率兵救長興先是張士

誠遣其司徒李伯昇以衆十餘萬來攻水陸並進城中
兵少不能禦公於江州聞報即命華高費聚等率三路
兵往援而諸軍戰皆不利遂潰耿炳文嬰城固守左副
元帥劉成出戰死於是敵復圍城結九寨為樓車下瞰
城中取土石填壕澘放火燒水關城中晝夜應敵凡月
餘內外不相聞公以圍久不解故復命遇春往救已
未吳遣平章吳宏等率兵攻撫州陳友諒右丞鄧克明
據城拒守僉院鄧愈自臨川間道夜襲之黎明至兵由

東西北三門入克明單騎出南門走自度不能免乃以
分省印詣愈降愈留克明於軍中令其弟志明還新淦
收其故部曲克明因請往江州見吳國公愈以兵送之
至中途克明逃歸新淦 戊辰黃河自平陸三門磧下
至孟津五百餘里皆清凡七日命祕書少監程徐祀之
甲戌吳常遇春兵至長興李伯昇棄營遁遇春追擊
俘斬五千餘人 是月察罕特穆爾李思齊遣兵圍鹿
臺攻張良弼詔和解之俾各還信地兵乃解 十二月

己亥陳友諒江西行省丞相胡廷瑞平章祝宗遣宣使
鄭仁傑詣江州納降於吳仁傑言廷瑞之意以將校久
居部曲人情相安既降之後願不以改屬他人吳國公
許諾以書報之是歲京師大飢屯田成收糧四十萬
石賜司農丞胡秉彝上尊金幣以旌其功

二十二年春正月辛亥胡廷瑞得吳國公書意遂決遣
其甥同僉康泰至江州降時宋龍鳳八年也甲寅詔
李思齊討四川張良弼平襄漢時兩軍不和故有是命

吳國公以胡廷瑞等降遂發九江如龍興已未師次
樵舍廷瑞與祝宗遣人齎陳氏所授丞相以下官宣印
及軍民糧儲之數來獻辛酉公至龍興廷瑞宗率行省
僚屬迎謁於新城門外公慰勞之俾各仍舊職壬戌公
入城軍令肅然民皆安堵謁孔子廟過鐵柱觀復出城
開宴於滕王閣諸儒咸賦詩為樂明日命存恤鰥寡孤
獨放陳友諒所畜鹿於西山戊辰築臺於城北龍沙之
上召城中父老民人悉集臺下諭之曰自古攻城畧地

鋒鏑之下民罹其殃今爾民得骨月安生理無所苦者皆丞相胡廷瑞灼見天道先機來歸為爾民之福也陳氏據此軍旅百需之供爾民甚苦之今吾悉去其弊軍需供億俱不以相累爾等各事本業毋游惰毋作非為以陷刑辟毋交結權貴以擾害良民各保父母妻子為吾良民於是民皆感悅建昌王溥饒州吳宏各率衆來見袁州歐普祥遣其子文廣來見公厚賜遣之鄧克明既逃歸新淦復收集舊部曲仍肆劫掠至是欲復降

恐見誅乃詐為商賈乘小舟至龍興城下潛使人覘可否為去就事覺被執并獲克明公責其反覆囚送建康
辛未寧州土官陳龍遣其弟良平率分寧奉新通城
靖安德安武寧六縣民兵二萬降於吳癸酉守吉安
土軍元帥孫本立曾萬中與其弟粹中詣龍興納款吳
國公以本立為江西行省參政萬中都元帥粹中行軍
指揮俾還守吉安乙亥陳友諒平章彭時中以龍泉
降於吳命仍其舊職二月丁丑朔盜殺陝西行省右

丞達布岱 癸未吳金華苗軍元帥蔣英劉震李福叛
殺守臣參政胡大海及郎中王愷總管高子玉初大海
下嚴州震等自桐廬來降大海喜其驍勇留置麾下待
之不疑至是震等謀亂以大海遇已厚未忍發李福謂
其衆曰胡參政待我輩信厚然兵柄在主將不殺之則
大事不成舉大事寧顧私恩乎衆從之以書通衢處苗
帥李佑之等約以二月七日同舉兵是日蔣英等入分
省署陽請大海至八詠樓下觀弩大海出將上馬英令

其黨鍾矮子跪於馬前陽訴曰蔣英等欲殺我大海未及答反顧英抽出鐵鎗若擊矮子狀因中大海腦仆地英即斷其首復殺大海子閻住執王愷愷正色曰吾職居卽署同守此土義當死寧從賊耶劉震欲全之賊黨吳得真與愷有隙曰無自遺患遂殺愷及其子寅掾史章誠亦死之典吏李斌懷省印縋城走嚴州告變於朱文忠文忠遣元帥何世明掾史郭彥仁等率兵討之至蘭溪英等懼乃驅掠城中女子西走降於張士誠大

海養子德濟聞難引兵奔訃吳國公即命左司郎中楊元果至金華總理軍儲事文忠亦率將士至金華鎮撫其民大海長身鐵面智力過人嘗自誦曰我本武人不讀書然吾行軍知有三事而已不殺人不虜人婦女不焚人廬舍故其軍一出遠近之人皆趨附之至是遇害公親為文以祭且命有司塑像配享晉卞壺廟後追封越國公謚武莊愷追封富塗縣男乙酉尋見於危光芒長丈餘色青白丁亥吳處州苗軍元帥李佑之賀

仁得等聞蔣英等已殺胡大海亦作亂殺院判耿再成
都事孫炎知府王道同及朱文剛等據其城朱文忠聞
亂遣元帥王祐等率兵屯縉雲以圖之再成累著勞績
自偏裨擢居帥職至是佑之等叛再成方與客飯聞反
即上馬收兵不及迎賊罵曰賊奴國家何負於汝乃敢
反耶賊將直前刺再成中頸而死胡深等收其尸藁葬
之吳國公命立廟以祀後復以衣冠改葬於聚寶山追
封高陽縣男炎初被執幽空室中賊環守之背炎降炎

不屈賀仁得以炙鴈斗酒饋炎炎不受大罵曰今日乃為鼠所困我死為主爾反覆賊死狗且不食守卒怒拔刀叱炎解衣炎曰此紫綺乃主上賜我者吾當服以死賊遂害之年三十餘後追封丹陽縣男塑像於耿再成祠道同亦為仁得所逼不屈而死後追封太原郡侯

辛卯吳國公既定洪都乃經度城守以舊城西南臨水不利守禦命移入三十步東南空曠復展二里餘以鄧愈為江西行省參政留守洪都萬思誠為行省都事以

佐之胡廷瑞張民瞻廖永堅傅璣潘友慶等從公還建
康 丁酉彗犯離宮西星至三月終光芒長二丈餘

壬寅吳國公聞處州之亂命平章邵榮率兵討之 是

月知樞密院事圖卜堅持穆爾奉諭李思齊討四川時思
齊退保鳳翔使至思齊進兵益門鎮使還思齊復歸鳳

翔 三月戊申彗不見星形惟有白氣形曲竟天西指

掃大角 己酉明玉珍僭稱帝於蜀國號大夏建元天

統倅周制設六卿又置翰林院承旨學士國子監祭酒

等官賦稅十取其一開廷試以策士置雅樂以供郊祀之用皆劉禎所為也 壬子彗行過太陽前惟有星形無芒在昴至戊午始滅 初張士誠聞蔣英之亂遣其弟士信率兵萬餘圍諸全州吳守將謝再興晝夜廬戰未決乃遣將設伏城外自引兵出戰戰既合伏起大敗之禽其將士千餘人士信憤益兵攻城再興慮不能支告急於浙東行省右丞朱文忠時金華叛寇初定而嚴州逼近敵境處州又為叛苗所據文忠自度兵少不能

應援聞邵榮將至乃與都事史炳謀曰兵法先聲而後
實今諸全被圍日久寇勢益盛而我軍少非謀不足以
制之今邵平章來討處州宜借以張聲勢亦制寇一奇
也炳曰善乃揚言右丞徐達與榮領大軍至嚴州剋日
進擊使諜者揭榜於義烏之古朴嶺士信兵見之果驚
謀夜遁同僉胡德濟覘知之密與再興謀癸丑發壯士
夜半開門出擊鼓譟從之寇兵亂走自相蹂踐及溺死
者甚衆士信驕侈不能拊循將士常載婦人樂器自隨

日以樗蒲蹴踘酣飲為事部將往往效之故至於敗

甲寅明玉珍陷雲南省治屯金馬山陝西行省參政徹

里特穆爾等擊敗之擒其弟明二 崇亥吳祝宗康泰

叛攻陷洪都府初洪都之降非二人本心既降數有叛

意時出語咎胡廷瑞廷瑞反覆開諭之故未即發及吳

國公還建康廷瑞恐二人為變不利於己乃微言於吳

國公即發使詣洪都令二人將所部兵往湖廣從徐

達聽征調二人舟次女兒港遂以其衆叛適遇商人布

船因掠其布為旗號進劫洪都是日暮至城下發鼓舉
火攻破新城門時鄧愈居故廉訪司聞變倉卒以數十
騎出走數與賊遇且戰且走從者多遇害愈窘甚從撫
州門出走還建康於是都事萬思誠知府葉琛皆死於
難公聞琛死痛悼之追封南陽郡侯復其家塑像於耿
再成之祠令有司歲時致祭辛未鄧愈至建康具言康
祝之叛公遣使詣漢陽命右丞徐達等還軍討之是
月命博囉特穆爾為中書平章政事位第二加太尉張

良弼受節制於博囉特穆爾李思齊遣兵攻良弼至於
武功良弼以伏兵大破之 夏四月丙子朔長星見其
形如練長數十丈在虛危之間後四十餘日乃滅 丁
亥熒惑離太陽二十九度不見當出不出 吳平章邵
榮及元帥王佑胡琛等兵攻處州燒其東北門軍士乘
城以入李佑之自殺賀仁得走縉雲耕者縛之檻送建
康伏誅處州復平以王祐守之榮乃還 甲午吳右丞
徐達復取洪都府時達等師抵城下祝宗康泰分兵拒

守達攻破之宗走新淦依鄧克明後為志明所殺函其
首以獻於吳泰走廣信為追兵所獲送建康泰胡廷瑞
之甥也吳國公以廷瑞故特宥之 乙未賊新橋張陷
安州博囉特穆爾來請援兵 是月紹興路大疫 五
月乙巳朔泉州賽甫丁據福州路福建行省平章賽斧
爾丹擊敗之餘衆航海還據泉州參政陳有定復汀州
路 丙午吳命大都督朱文正統元帥趙德勝等同參
政鄧愈鎮洪都又以阮宏道為郎中李勝為員外郎汪

廣洋為都事往佐之程國儒知洪都府事文正至增浚
城池嚴為守備 卒未明玉珍遣僞將楊尚書守重慶
分兵寇龍州青川犯興元鞏昌等路 是月張士誠海
運糧十三萬石至京師 六月戊寅中書平章政事察
罕特穆爾遣使報書於吳吳國公不答因謂左右曰察
罕書辭婉媚是欲啗我我豈可以甘言誘哉況徒以書
來而不反我使者其情偽可見也今張士誠據浙西陳
友諒據江漢方國珍陳友定又梗於東南天下紛紛未

有定日予方有事之秋未暇與校也 辛巳彗見紫微
垣光芒長尺餘東南指西南行戊子光芒掃上宰 時
山東俱平獨益都孤城猶未下至是田豐王士誠復結
謀圖叛初豐之降也察罕特穆爾推誠待之不疑數獨
入其帳中及豐既謀變乃請察罕特穆爾行觀營壘衆
以為不可往察罕特穆爾曰吾推心待人安得人人而
防之左右請以力士從又不許乃從輕騎十有一人行
至豐營遂為士誠所刺察罕特穆爾既死豐與士誠走

入益都城衆乃推博囉特穆爾為總兵官復圍益都事聞帝震悼朝廷公卿及京師四方之人不問男女老幼無不慟哭者先是有白氣如索長五百餘丈起危宿掃太微垣太史奏山東當大水帝曰不然山東必失一良將即馳詔戒察罕特穆爾勿輕舉未至而已及於難詔贈河南行省左丞相追封忠襄王謚獻武食邑沈丘縣所在立祠歲時致祭其父司徒阿嚕溫賜良田二百頃其子庫庫特穆爾授中書平章政事兼知河南山東行

樞密院事一應軍馬並聽節制仍詔諭其將士曰凡爾
將佐久為察罕特穆爾從事惟恩與義實同骨肉視彼
逆黨不共戴天當力圖報復以伸大義己亥益都賊兵
出戰庫庫特穆爾生擒六百餘人斬首八百餘級吳國
公聞察罕死歎曰天下無人矣 秋七月乙卯尋滅

丙辰熒惑見西方須臾成白氣如長蛇光炯有文橫亘
中天移時乃滅 吳平章邵榮參政趙繼祖以謀反伏
誅榮麤勇善戰與吳國公同起兵濠州公待之甚厚自

平處州還遂驕蹇有覬覦心常憤憤出怨言部將有欲告之者榮不自安與繼祖謀俟間作亂至是公閱兵三山門外榮與繼祖伏兵門內欲為變會大風卒發吹旗觸公衣公異之易服從他道還榮等不得發遂為部下士宋國所告公召榮等面詰之俱伏曰死而已公不欲即誅幽於別室謂諸將曰吾不負榮而所為如此將何以處之常遇春曰榮等一旦忘恩義謀為亂逆主公縱不忍殺之遇春等義不與之俱生公乃具酒飲食之不忍殺之遇春等義不與之俱生公乃具酒飲食之

涕泣與訣皆就刑 是月河決范陽漂民居 西湖書

院舊有經史書版兵後零落行省左右司員外郎陳基

白平章張士信出官錢補刊從之期年而工畢

據陳基
書院自

叙修入 八月癸巳陳友諒將熊天瑞寇吉安吳守將孫

本立戰敗走永新天瑞復攻破永新執本立至贛州殺

之友諒使其知院饒鼎臣守吉安鼎臣剽悍有膽略所

至毒害人呼為饒大膽 己亥庫庫特穆爾與博囉特

穆爾張良弼據延安掠黃河上下欲東渡以奪晉寧乞

賜詔諭 是月張士誠殺淮南行省左丞汪同同初集

義兵捍禦鄉井累官徽州路治中兼元帥領兵征饒州
單騎潛往浙張士誠以禮召至姑蘇同見其心不純乃
去之淮安見左丞史椿椿本士誠部將與張士德皆為
謀主士德被擒椿見諸將驕侈又左丞徐義讒毀椿椿
遂有異志至是見汪同氣義殊洽謂同曰李察罕公忠
足往往一見之可也同往謁察罕察罕恨相見晚俾朝
於京拜淮南行省左丞還見察罕察罕曰張士誠非忠

於國家者中原事定平江南當自姑蘇始君與史君宜
協力焉未幾察罕為田豐所害椿曰不幸及此宜要金
陵兵往取姑蘇中原底定尋為之計乃遣使齎書往建
康使本姑蘇人士誠因得其書大怒張士信與椿素相
得招與言事同曰往不可測也椿曰將卒家留姑蘇必
有所顧一也中原事如此後援未可恃二也金陵兵未
即向太湖三也我輩姑待時可也未必便害我輩况四
平章我嘗救其危急宜不至此四平章謂士信也同遂

行至姑蘇士誠即拘同問曰我何負於汝而反同曰我

之來以汝為元太尉忠於國家今汝既叛我豈得從汝

反耶士信力營救之且具酒饌為別同曰為語平章具

荷厚意吾能死忠不能為無義生也但我死後諸公亦

不能久富貴耳遂遇害臨死不少屈事聞追封平陽郡

公同既死士誠遂發兵攻淮安執史椿殺之

考異月山叢談云史

椿遣使請降太祖遣使報之往返之間士誠覺之乃詐死而使士信主國事太祖信之遣使弔慰賂書士信言戮力北方事及史椿計決士誠遂發兵猝至淮安執之以歸士誠復出視事按士誠欲討史椿何必詐死即令

詐死明祖亦豈遼信而遣使弔慰
恐非事情今從趙訪汪左丞傳

九月癸卯朔劉福

通以兵援田豐至火星埠庫庫特穆爾遣閻保邀擊大破之
戊辰以知樞密院事伊蘓為遼陽行省左丞相先是賊壘特穆爾巴哈程恩忠等陷永平詔伊蘓出師遂復灤州及遷安縣時遼東郡縣惟永平不被兵儲粟十萬芻藁山積居民殷富賊乘間竊入增土築城因河為塹堅守不可下伊蘓乃外築大營絕其樵采數與賊戰獲其偽帥二百餘人平山寨數十又復昌黎撫寧二

縣擒壘特穆爾巴哈送京師賊急乃乞降於參政薩里
特穆爾為請命於朝詔許之命伊蘓退師伊蘓度賊必
以計怠我師乃嚴備以偵之程思忠果棄城遁去亟追
至瑞州殺獲萬計賊遂東走金復州至是詔還京師拜
遼陽左丞相知行樞密院事撫安遼東兵農委以便宜
開省於永平總兵如故金復海蓋乾王等賊並起西侵
興中州陰由海道趣永平聞伊蘓開省乃止伊蘓亟分
兵防其衝突賊乃轉攻大寧為守將王聚所敗斬其渠

魁衆潰皆西走伊蘓慮賊窺上都即調右丞呼琳岱提
兵護上都簡精銳自躡賊後賊果寇上都呼琳岱擊破
之賊衆又大潰永平大寧始復乃分命官屬勞來安集
其民使什伍相保以事耕種民為立石頌其勲德 己
巳有流星如酒盃色青白光明燭地熒惑犯鬼宿積尸
氣 冬十月壬申朔江西行省平章多律巴哈移檄討
巴薩喇巴哈時多律巴哈分省廣州適州城為邵宗愚
所陷執巴薩喇巴哈殺之 甲戌博囉特穆爾南侵庫

庫特穆爾所守之地遂據真定路 戊子吳池州元帥
羅友賢據州之神山寨作亂謀與張士誠通杭歙震動
命常遇春率兵討之 辛卯吳設關市批驗所官主通
百貨鹽十分而稅其一他物十五分稅一 十一月乙
巳庫庫特穆爾復益都田豐等伏誅庫庫特穆爾既襲
父職身先士卒誓必復讐人心亦思自奮圍城益急賊
悉力拒守乃以壯士穴地通道而入遂克之盡誅其黨
取田豐王士誠之心以察察罕特穆爾遣關保以兵復

莒州於是山東悉平庚申詔授庫庫特穆爾大尉餘官
並如故將校士卒論賞有差阿嚕戩追封汝陽王察罕
特穆爾改封潁川王謚曰忠襄當是時東至淄沂西踰
閩陝皆晏然無事庫庫特穆爾乃駐兵於汴洛朝廷方
倚之以為安而博囉特穆爾復以兵爭晉冀帝雖屢諭
解之而讐隙日深癸亥明玉珍兵陷青川十二月
丁亥吳大都督朱文正遣裨將率兵復吉安饒鼎臣出
走遂以參政劉齊陳海同李明道會萬中粹中共守之

以朱叔華知府事兵還洪都 壬辰吳廣信守將元帥
葛俊擅發民夫築城浚池浙東行省左丞朱文忠遣人
諭止之俊不聽反出不軌言文忠恐其為變欲討俊先
遣從事王辰往察之辰還報曰彼城守如故若臨之以
兵恐激其變文忠曰此人不足惜姑為一郡生靈少忍
之遂不復問再遣都事劉肅往勞之諭以禍福俊心乃
安 先是帝遣戶部尚書張昶等齎龍衣御酒八寶頂
帽榮祿大夫江西行省平章政事宣命詔書航海至慶

元欲因以通吳方國珍遣檢校燕敬以告吳國公公不
之答敬還國珍懼乃送昶於福建平章雅克濟巴哈所時
左丞王溥在建昌聞之遣人報公公命溥招之來且命
符璽郎劉紹先候之於廣信溥招昶果至遂偕紹先赴
建康昶見公不拜公怒曰元朝不達世變尚敢遣人扇
惑我民昶俛首無一言公不欲窮詰命中書館之時召
問以事知其才可用遂留之 廣予以中書平章政事
福嘉努為御史大夫 是月庫庫特穆爾遣尹煥章至

吳送前使自海道還因以馬來獻是歲樞密副使李士瞻上疏極言時政凡二十條一曰悔已過以詔天下二曰罷造作以快人心三曰御經筵以講聖學四曰延老成以詢治道五曰去姑息以振乾剛六曰開言路以求得失七曰明賞罰以厲百司八曰公選舉以息奔競九曰察近倖以杜奸弊十曰嚴宿衛以備非常十一曰省佛事以節浮費十二曰絕濫賞以足國用十三曰罷各宮屯種俾有司經理十四曰減常歲計置為諸宮用

度十五曰招集散亡以實八衛之兵十六曰廣給牛具
以備屯田之用十七曰獎勵守令以勸農務本十八曰
開誠布公以禮待藩鎮十九曰分遣大將急保山東二
十曰依唐廣寧故事分道進取先是薊國公托和齊上
言乞罷三宮造作帝為減軍匠之半還隸宿衛而造作
如故故士瞻疏首及之 帝嘗謂伊納曰太子苦不曉
秘密佛法秘密佛法可以延壽乃令圖嚕特穆爾教太
子以秘密佛法太子悅之嘗於清寧殿布長席西番僧

高麗女東西列坐太子顧謂左右曰李先生教我儒書
多年我不省書中所言何事西番僧教我佛法我一夕
便曉李先生者諭德好文也太子由是惑溺於邪道無
復曩時惡伊納之意矣

考異此據庚申外史修入元史
順帝紀但云佛法而不言秘密

又以高麗女為高麗僧按真正佛法非一夕所能曉教
秘佛法者乃西番僧於高麗僧無涉外史理長今從之

帝以讒廢高麗國王巴延特穆爾立達斯特穆爾為
高麗國王國人上書言舊王不當廢新王不當立之故
初皇后奇氏宗族在高麗恃寵驕橫巴延特穆爾戒飭

不悛遂盡殺奇氏族皇后謂太子曰爾年已長何不為
我報讐時高麗王昆弟有留京師者乃議立達斯特穆
爾為王而以奇族子三保努為元予以將作同知崔特
穆爾為丞相遣兵萬人送之國至鴨綠江為高麗兵所
敗僅餘十七騎還京師皇后大慙



資治通鑑後編卷一百八十